



Broj: 01-50-1-15-39/08
Sarajevo, 19. 11. 2008.godine

Z A P I S N I K
39. sjednice Predstavničkog doma
Parlamentarne skupštine Bosne i Hercegovine,
održane 5. i 19. novembra 2008. godine

Sjednica je počela 5.11. 2008. u 10,13 sati. Prisustvovalo je 39 poslanika. Odsutnost su opravdali: Jovan Todorović, Vinko Zorić i Momčilo Novaković.

Iz Vijeća ministara BiH sjednici su prisustvovali ministri Dragan Vrankić, Briša Čolak i Tarik Sadović.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade te nevladine organizacije Centri civilnih inicijativa.

U uvodnim napomenama predsjedavajući Lozančić rekao je da je prijedlog dnevnog reda dopunjen s dvije tačke, i to:

- kao 4. tačka uvršten je zahtjev poslanika Azre Hadžiahmetović za razmatranje Prijedloga zakona o izmjenama Zakona o plaćama i naknadama u institucijama BiH po hitnom postupku, u skladu s članom 127. Poslovnika i

- kao 10. tačka uvršten je Izvještaj komisije Kolegija o nastojanju za postizanje saglasnosti o Prijedlogu zaključaka Kluba SDA povodom rasprave o Izvještaju Državne komisije za reviziju odluka o naturalizaciji stranih državljana u BiH za period od 1.1.2008. do 30.6.2008., s prijedlogom zaključaka.

U raspravi o prijedlogu dnevnog reda Denis Bećirović predložio je da se skinu 13. i 14. tačka: Inicijativa poslanika Branka Dokića u vezi sa izlaganjem predsjedavajućeg Predsjedništva BiH Harisa Silajdžića prilikom obraćanja Generalnoj skupštini UN-a i Parlamentarnoj skupštini Vijeća Evrope i Inicijativa poslanika Remzije Kadrića za raspravu u Domu povodom Rezolucije Narodne skupštine Republike Srpske o ciljevima i mjerama Republike Srpske, sa 14. posebne sjednice, održane 15.10.2008. Dodao je da bi bila bolja opcija da ih predlagači povuku, iznoseći mišljenje da ove tačke "nemaju apsolutno nikakve svrhe i nikakvog smisla u postojećoj političkoj konstelaciji odnosa ovdje u Parlamentu".

Remzija Kadrić predložio je da se s dnevnog reda skine 14. tačka - Inicijativa Branka Dokića.

Sefer Halilović podržao je inicijative i poslanika Dokića i poslanika Kadrića, predlažući da se rasprava o njima pripremi te da se osigura prisustvo Harisa Silajdžića i nekog iz rukovodstva Narodne skupštine RS-a.

Savo Erić predložio je da se dnevni red dopuni uvrštavanjem Prijedloga odluke o zaduživanju Predsjedništva BiH da podnese izvještaj o troškovima Predsjedništva BiH.

Bakir Izetbegović predložio je da se u dnevni red uvrsti tačka: Analiza stanja u projektu CIPS, s posebnim osvrtom na izdavanje lažnih dokumenata.

O ovom prijedlogu i njegovom obrazloženju, kao i drugim prijedlozima, vođena je duža polemična rasprava u kojoj su učestvovali: Milorad Živković, Bakir Izetbegović, Milica Marković, Drago Kalabić, Slavko Jovičić, Sadik Ahmetović, Selim Bešliagić, Zlatko Lagumdžija, Branko Dokić, Azra Hadžiahmetović, Mirko Okolić, Denis Bećirović, Beriz Belkić, Jozo Križanović, Jerko Ivanković, Lijanović i Adem Huskić.

U raspravi su izneseni i sljedeći prijedlozi:

Drago Kalabić-da se u dnevni red uvrsti tačka: Aktuelna sigurnosna situacija u BiH sa posebnim osvrtom na terorizam.

Zlatko Lagumdžija predložio je da se uvrsti prijedlog zaključaka:

„Povodom posljednjih događaja u kriminalnom miljeu, u javnosti nazvanih kao bombaški napad u Tržnom centru u Vitezu, suđenja kriminalnoj grupi u Sarajevu s pritiscima na organe vlasti i slučaj Milovanović/Hadžić kao dio međunarodne kriminalne afere, zadužuje se Ministarstvo sigurnosti BiH da za narednu sjednicu pripremi Informaciju o ovim događajima, s planom aktivnosti nadležnih institucija s ciljem poboljšanja ukupne sigurnosne situacije i podrške institucijama u borbi protiv organiziranog kriminala“.

Jozo Križanović predložio je da Dom usvoji zaključak koji glasi: „Dopuna dnevnog reda nije moguća u fazi usvajanja dnevnog reda, ako nije inicirana u pisanoj formi i upućena Kolegiju Predstavničkog doma minimalno 24 sata prije sjednice Doma“.

Adem Huskić podsjetio je na inicijativu za povlačenje iz procedure Prijedloga zakona o maloljetnim počinocima krivičnih djela i krivičnopravnoj zaštiti djece i maloljetnika, koju je dostavilo Koordinaciono tijelo za praćenje provođenja Strategije protiv maloljetničke delinkvencije za BiH, pa je predložio da se pomenuti Prijedlog zakona skine s dnevnog reda.

Husein Nanić je, u raspravi o prijedlogu dnevnog reda, podsjetio na Zaključak s 31. sjednice Doma, koji je usvojen povodom rasprave o njegovoj inicijativi - da se zaduži Vijeće ministara BiH da izradi i u što je moguće kraćem roku, a najkasnije u roku od 45 dana, dostavi Parlamentarnoj skupštini BiH informaciju o spremnosti institucija BiH za preuzimanje obaveza u vezi s primjenom Sporazuma o stabilizaciji i pridruživanju. Zatražio da Kolegij provjeri u Vijeću ministara BiH dokle se stiglo s pripremom te informacije kako bi bila uvrštena u dnevni red sjednice Doma kada bi se o njoj raspravljalo.

Poslije rasprave, predsjedavajući je upozorio da postoje obavezne tačke dnevnog reda i da bi poslanici trebalo da vode računa o tome kako se ne bi gubilo vrijeme, te da se neće na glasanje davati prijedlozi za obavezne tačke. U vezi s prijedlogom Adema Huskića, rekao je da predlagač ima pravo povući prijedlog zakona do kraja rasprave u prvom čitanju ako procijeni da je to potrebno.

Zatim je predsjedavajući, na zahtjev predsjedavajućeg Kluba SNSD-a, dao pauzu.

Drago Kalabić obavijestio je Dom da je u pauzi dogovoreno da se za sljedeću sjednicu u dnevni red uvrsti prijedlog Kluba SNSD-a i Zlatka Lagumdžije, kao jedna tačka: Aktuelna sigurnosna situacija u BiH, s posebnim osvrtom na terorizam, prihvatajući tekst prijedloga zaključka koji je iznio Zlatko Lagumdžija – da se pribavi materijal, a da prijedlog Bakira Izetbegovića također bude uvršten u dnevni red naredne sjednice, kao posebna tačka, kako je i predložio.

Poslije ovog obavještenja Kalabića, predsjedavajući je na glasanje dao prijedlog Save Erića za dopunu dnevnog reda.

Prijedlog je usvojen sa 24 glasa "za" (Federacija BiH 16, RS osam) i tri "suzdržana".

Zatim je predsjedavajući na glasanje dao kao jedinstven prijedlog klubova SNSD-a, SDP-a i SDA, koji je iznio Drago Kalabić. Prijedlog je usvojen sa 27 glasova "za" (Federacija BiH 20, RS sedam) i jednim "suzdržanim".

Prijedlozi za skidanje inicijativa Dokića i Kadrića nisu dati na izjašnjavanje jer nisu u skladu s Poslovnikom.

Također, ni prijedlog zaključka Joze Križanovića nije dat na glasanje zbog neusklađenosti s Poslovnikom. Predsjedavajući je rekao da će ovaj prijedlog biti prosljeđen Ad hoc komisiji za pripremu izmjena i dopuna Poslovnika.

Predsjedavajući Lozančić konstatirao je da je za 39. sjednicu Doma utvrđen sljedeći

D N E V N I R E D

1. Usvajanje zapisnika 37. i 38. sjednice Predstavničkog doma;
2. Poslanička pitanja i odgovori;
3. Zahtjev poslanika Nike Lozančića, Beriza Belkića i Milorada Živkovića za razmatranje Prijedloga zakona o izmjeni Zakona o državnoj službi u institucijama BiH po hitnom postupku, u skladu s članom 127. Poslovnika;
4. Zahtjev poslanika Azre Hadžiahmetović za razmatranje Prijedloga zakona o izmjenama Zakona o plaćama i naknadama u institucijama BiH po hitnom postupku, u skladu s članom 127. Poslovnika;
5. Prijedlog zakona o programu zaštite svjedoka u Bosni i Hercegovini (drugo čitanje);

6. Prijedlog zakona o izmjenama Zakona o krivičnom postupku, predlagač: Ustavnopravna komisija (drugo čitanje);
7. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (drugo čitanje);
8. Prijedlog zakona o izmjeni Zakona o klasificiranju djelatnosti u Bosni i Hercegovini (drugo čitanje);
9. Prijedlog zakona o maloljetnim počiniocima krivičnih djela i krivičnopravnoj zaštiti djece i maloljetnika (prvo čitanje);
10. Prijedlog odluka o zaduženju Predsjedništva BiH da podnese izvještaj o troškovima Predsjedništva BiH (predlagač: poslanik Savo Erić);
11. Izvještaj komisije Kolegija o nastojanju za postizanje saglasnosti o prijedlogu zaključka Kluba SDA povodom rasprave o Izvještaju Državne komisije za reviziju odluka o naturalizaciji stranih državljana u BiH za period od 1.1.2008. do 30.6.2008., s prijedlogom zaključaka;
12. Informacija Vijeća ministara BiH u vezi sa zahtjevom poslanika Rifata Dolića;
13. Prijedlog zaključaka Komisije za saobraćaj i komunikacije povodom rasprave o tački: Aktuelna situacija u Radioteleviziji BiH i provođenje reforme Javnog RTV sistema u BiH ;
14. Inicijativa poslanika Adema Huskića u vezi s Odlukom o ograničenju uvoza putničkih automobila, teretnih vozila i automobilskih guma;
15. Inicijativa poslanika Branka Dokića u vezi sa izlaganjem predsjedavajućeg Predsjedništva BiH Harisa Silajdžića prilikom obraćanja Generalnoj skupštini UN-a i Parlamentarnoj skupštini Vijeća Evrope;
16. Inicijativa poslanika Remzije Kadrića za raspravu u Domu povodom Rezolucije Narodne skupštine Republike Srpske o ciljevima i mjerama Republike Srpske, sa 14. posebne sjednice, održane 15.10.2008.

Ad. 1. Usvajanje zapisnika 37. i 38. sjednice Predstavničkog doma

Nije bilo rasprave o zapisnicima.

Zapisnici 37.i 38. sjednice usvojeni su jednoglasno – sa 32 glasa „za“ (iz Federacije BiH 20, iz Republike Srpske 12).

Ad. 2. Poslanička pitanja i odgovori

Predsjedavajući Lozančić konstatirao je da su odgovore na pitanja od prošle do ove sjednice dobili poslanici:

- Lazar Prodanović - od Vijeća ministara BiH, na pitanje postavljeno na 34. sjednici;
- Rifat Dolić - od Vijeća ministara BiH, na pitanja postavljena na 33. i 34. sjednici;
- Šemsudin Mehmedović - od Vijeća ministara BiH, na pitanje postavljeno na 34. sjednici;
- Drago Kalabić - od Komisije za očuvanje nacionalnih spomenika, na pitanje postavljeno na 34. sjednici;
- Branko Dokić - od Vijeća ministara BiH, na pitanje postavljeno na 34. sjednici;
- Azra Hadžiahmetović - od Upravnog odbora Javnog RTV sistema, na pitanje postavljeno na 35. sjednici;
- Husein Nanić - od Vijeća ministara BiH, na pitanje postavljeno na 35. sjednici;
- Denis Bećirović - od Vijeća ministara BiH i od Regulatorne agencije za komunikacije BiH, na pitanja postavljena na 35. sjednici;
- Slavko Matić - od Regulatorne agencije za komunikacije BiH, na pitanje postavljeno na 35. sjednici;
- Husein Nanić - od Ministarstva vanjskih poslova BiH, na pitanje postavljeno na 35. sjednici i
- Husein Nanić - od Komisije za očuvanje nacionalnih spomenika i Federalnog ministarstva kulture i sporta, na pitanje postavljeno na 36. sjednici.

Zlatko Lagumdžija rekao je da je dobio odgovor na pitanje postavljeno na 34. sjednici, ali da nije spomenut među poslanicima koji su dobili odgovore¹.

Lagumdžija je komentirao odgovor (dobiven na 38. sjednici), izrazio nezadovoljstvo i postavio nova pitanja:

“1. Zašto ne realizirate Plan aktivnosti institucija BiH za povratak lica iz vojne baze Gvantanamo (Mapa puta) po zaključku Parlamentarne skupštine BiH?

2. Zašto je izostala diplomatska akcija po ovom pitanju na bazi dogovora s advokatskim timom iz februara 2007. godine kao i aktivnosti drugih ministarstava po zahtjevu advokata?

3. Šta će Vijeće ministara BiH preduzeti na spajanju s porodicama svih onih članova ‘šestorke’ koji budu pušteni bez suđenja iz Gvantanamo ili oslobođeni pred američkim sudom, s obzirom da se radi o događajima koji mogu brzo uslijediti a za koje naše institucije ne pokazuju nikakvu ni volju ni spremnost da im idu u susret u interesu naših građana i države.”

Odgovore dobivene do 39.sjednice komentirali su Azra Hadžiahmetović i Husein Nanić.

Postavljena su sljedeća nova poslanička pitanja:

Mirko Okolić:

„Od Vijeća ministara BiH tražim da mi dostave podatke svih međunarodnih ulaganja u BiH u periodu od 1996. do 2008., pod kojim uslovima i po entitetima. Ulaganja razvrstati po privrednom, proizvodnom, razvojnom karakteru te ulaganja u javnu potrošnju, odnosno u sve druge svrhe.“

Rifat Dolić:

1. „Šta možete preduzeti da se zaštite osnovna ljudska prava građanina Mehmeda Šumića, sina Latifa, nastanjenog u Blagaj Japri bb u Bosanskom Novom – Novom Gradu, kojeg je, na zahtjev supruge Pleme i uz pomoć rukovodioca Odjeljenja za nestala lica, a sada advokata Esada Bajramovića, Općinski sud u Bihaću, po sutkinji Jasminki Karabegović, rješenjem broj R2. 161/00, od 3.6.2002., nezakonito proglasio mrtvim i od tada do danas Mehmed Šumić je oficijelno mrtav, iako je živ, bez prava na identitet i važeća lična dokumenta?“

2. „Šta ste preduzeli na zaštiti preostale imovine BiH, njenih firmi i građana u zemljama bivše Jugoslavije i zašto ni nakon više od tri mjeseca nakon donošenja zaključka ovog doma Vijeće ministara BiH nije dostavilo Informaciju o stanju imovine BiH, njenih firmi i građana u zemljama bivše Jugoslavije i planiranim mjerama za njenu zaštitu i vraćanje zakonitim vlasnicima u BiH?“

Sadik Ahmetović:

Upoznao je Dom da je pripremio pismo Jelku Kacinu, poslaniku u Evropskom parlamentu, a odnosi se na njegove intervencije u rezoluciji vezanim za povratak izbjeglica, posebno na području općine Srebrenica i na njegovu intervenciju da 11. juli, Dan sjećanja na stradanje Bošnjaka Srebrenice, bude proglašen međunarodnim danom sjećanja na Srebrenicu u Evropi. Rekao je da je naveo spisak poslanika pa će ponuditi da potpišu one koji to hoće.

Bajazit Jašarević:

„Kada će Vijeće ministara BiH podnijeti Nacrt budžeta za 2009. godinu Predsjedništvu BiH?

Kada će Predsjedništvo BiH podnijeti Prijedlog budžeta za 2009. godinu Parlamentarnoj skupštini BiH?

U skladu s članom 128. Poslovnika Predstavničkog doma Parlamentarne skupštine BiH, Predsjedništvo BiH obavezno je podnijeti Prijedlog budžeta za narednu godinu do 15.10.tekuće godine.“

Sadik Bahtić:

„1. Kada će Vijeće ministara BiH, u skladu sa zaključkom ovog parlamenta, i niza odgovora na moja poslanička pitanja, popisati i vratiti imovinu bivšeg Saveza komunista koju je SDP nezakonito prisvojio, uzurpirao, opljačkao te je koristi i izdaje u zakup?

2. Tražim od Vijeća ministara BiH odgovor i sva dokumenta vezana za slučaj deportacije 'Alžirske grupe'.

¹ Prilikom provjere utvrđeno je da je Z.Lagumdžija predmetni odgovor dobio na 38. sjednici, ali je on odsustvovao pa odgovor nije tada komentirao.

Husein Nanić:

Podsjetivši na upitnik koji su poslanici na početku mandata dobili, u kojem su, uz ostalo, pitani i na koji način žele dobivati materijale, postavio je Kolegiju Sekretarijata pitanje:

„Postavljam pitanje hoćete li i kada konačno uraditi projekat dostavljanja materijala u elektronskoj formi i omogućiti poslanicima koji žele na taj način primati materijale da to pravo i koriste te da li ćete instalirati wireless za bežično korištenje interneta u zgradi Parlamentarne skupštine BiH.“

Jozo Križanović – inicijativa Kolegiju PD:

„Predstavnički dom Parlamentarne skupštine BiH traži od Kolegija da osigura bolje tehničke uslove rada na sjednicama Predstavničkog doma:

- ozvučenje,
- elektroničko glasanje, prijavljivanje za rasprave i replike,
- osvjetljenje i
- klimatizaciju.

Martin Raguž i Vinko Zorić:

„Šta je Vijeće ministara BiH uradilo po **zaključku broj 4.** ovog doma, donesenog 20. februara 2008., uz usvajanje Zakona o budžetu institucija BiH i međunarodnih obaveza BiH za 2008. godinu?

Podsjećam na zaključak: **Zadužuje se Vijeće ministara BiH da sačini program/plan aktivnosti za rješavanje smještaja institucija BiH, kako bi se smanjili troškovi zakupa.**

Isto tako tražim odgovor vezano za ranije zaključke, sa sjednica ovog doma, održanih 29.3. i 4.4.2007., gdje se od Vijeća ministara BiH tražilo da da' prijedlog rasporeda sjedišta državnih agencija, institucija prema planu njihovog osnivanja, za koje nikad nije dostavljen odgovor.“

Velimir Jukić:

„Šta preduzima Vijeće ministara BiH da u zakonom predviđenom roku izvrši svoje obaveze o izboru i popuni upražnjenih mjesta u rukovodstvu (menadžmentu), upravnim i/ili nadzornim odborima institucija BiH?“

Denis Bećirović:

„1. Kakva je bila uloga člana Predsjedništva BiH Beriza Belkića (SBiH), predsjednika Federacije BiH Safeta Halilovića (SBiH) i ministra unutrašnjih poslova Federacije BiH Rame Masleše (SBiH) u predmetu 'Alžirska grupa'?

2. Konkretno, da li se neko od navedenih lica suprotstavio hapšenju 'Alžirske grupe'?

3. Ako nije, zašto se niko od navedene trojice nije suprotstavio hapšenju 'Alžirske grupe'?“

Na pitanje Save Erića kada će ovaj dom raspravljati o Nacrtu budžeta za 2009. godinu i kada planiramo usvojiti Budžet za 2009. godinu, predsjedavajući Lozančić odgovorio je odmah na sjednici.

Ad. 3. Zahtjev poslanika Nike Lozančića, Beriza Belkića i Milorada Živkovića za razmatranje Prijedloga zakona o izmjeni Zakona o državnoj službi u institucijama BiH po hitnom postupku, u skladu s članom 127. Poslovnika

Predsjedavajući Lozančić dao je kratke uvodne napomene.

Nije bilo rasprave o zahtjevu za hitni postupak.

Prilikom glasanja, zahtjev za hitni postupak nije prihvaćen – „za“ je glasalo 10 poslanika (iz Federacije BiH četiri, iz Republike Srpske šest), „protiv“ 19 i „suzdržana“ su bila tri poslanika.

Nakon glasanja o zahtjevu za hitni postupak, predsjedavajući je dao na izjašnjavanje prijedlog da se Prijedlog zakona o izmjeni Zakona o državnoj službi u institucijama BiH razmatra po skraćenom postupku, u skladu s članom 126. Poslovnika. „Za“ je glasalo 19 poslanika (iz Federacije BiH devet, iz Republike Srpske 10), „protiv“ osam a tri poslanika bila su „suzdržana“. Predsjedavajući je konstatirao da, zbog nedovoljne entitetske većine, slijedi usaglašavanje u Kolegiju o skraćenoj proceduri.

Ad. 4. Zahtjev poslanika Azre Hadžiahmetović za razmatranje Prijedloga zakona o izmjenama Zakona o plaćama i naknadama u institucijama BiH po hitnom postupku, u skladu s članom 127. Poslovnika

Poslije uvodnih napomena predsjedavajućeg, Azra Hadžiahmetović podnijela je obrazloženje zahtjeva za hitni postupak, kao i potrebe za donošenje predloženog zakona.

Nakon obrazloženja predlagača zakona, u raspravi su učestvovali: Milorad Živković, Azra Hadžiahmetović i Beriz Belkić.

Prilikom glasanja o zahtjevu za hitni postupak, „za“ je bilo 19 poslanika (iz Federacije BiH 17, iz Republike Srpske dva), „protiv“ devet i tri poslanika bila su „suzdržana“. Predsjedavajući je konstatirao da nema potrebne entitetske većine i da će Kolegij obaviti usaglašavanje o zahtjevu za hitni postupak.

Ad. 5. Prijedlog zakona o programu zaštite svjedoka u Bosni i Hercegovini (drugo čitanje)

U uvodnim napomenama predsjedavajući Doma podsjetio je na izvještaj nadležne Ustavnopravne komisije, kao i na to da je u plenarnoj fazi Milorad Živković podnio tri amandmana.

Predsjedavajući Ustavnopravne komisije Šefik Džaferović obrazložio je Izvještaj Komisije i razloge neprihvatanja amandmana.

Milorad Živković obrazložio je svoje amandmane koje ponovo brani u plenarnoj fazi.

U raspravi su učestvovali: Šefik Džaferović, Milorad Živković, ministar Tarik Sadović, Beriz Belkić, Slavko Jović i Adem Huskić.

Nakon rasprave, predsjedavajući je dao na glasanje tri amandmana koje je podnio Milorad Živković. Nijedan od predloženih amandmana nije usvojen. Rezultati glasanja su sljedeći:

Amandman I. „za“ 10, „protiv“ 17, „suzdržana“ četiri poslanika.

Amandman II. „za“ devet, „protiv“ 17, „suzdržanih“ šest poslanika.

Amandman III. „za“ devet, „protiv“ 18, „suzdržana“ četiri poslanika.

Nakon glasanja o amandmanima, pristupilo se glasanju o Prijedlogu zakona. „Za“ je glasalo 19 poslanika (iz Federacije BiH 17, iz Republike Srpske dva), „protiv“ devet a „suzdržana“ su bila četiri poslanika. Zbog nedovoljne entitetske većine, Kolegij kao komisija usaglašavat će se o Prijedlogu zakona o programu zaštite svjedoka u Bosni i Hercegovini (zakon u drugom čitanju).

Ad. 6. Prijedlog zakona o izmjenama Zakona o krivičnom postupku, predlagač: Ustavnopravna komisija (drugo čitanje)

Nakon uvodnih napomena predsjedavajućeg, nije bilo rasprave o ovoj tački dnevnog reda.

Prijedlog zakona o izmjenama Zakona o krivičnom postupku, predlagača Ustavnopravne komisije, usvojen je u drugom čitanju sa 32 glasa „za“ (iz Federacije BiH 21, iz Republike Srpske 11) i jednim „suzdržanim“ glasom.

Ad. 7. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (drugo čitanje)

Predsjedavajući je dao kratke uvodne napomene i rekao da je Selim Bešliagić u plenarnoj fazi podnio dva amandmana.

Selim Bešliagić obrazložio je svoje amandmane.

U raspravi su učestvovali: Rifat Dolić, pomoćnik ministra finansija i trezora Zahira Muratović, Jerko Ivanković Lijanović, Selim Bešliagić, Bajazit Jašarević, Jozo Križanović i Velimir Jukić.

Prije izjašnjavanja o Prijedlogu zakona, predsjedavajući je dao na glasanje amandmane koje je podnio Selim Bešliagić. Amandmani nisu prihvaćeni. Rezultati glasanja su sljedeći:

Amandman I. - „za“ devet, „protiv“ 20, „suzdržana“ tri.

Amandman II. - „za“ osam, „protiv“ 19, „suzdržana“ četiri.

Poslije glasanja o amandmanima, Dom se izjasnio o Prijedlogu zakona.

„Za“ je glasalo 17 poslanika (iz Federacije BiH 15, iz Republike Srpske dva), „protiv“ osam i „suzdržanih“ je bilo osam poslanika.

Predsjedavajući je konstatirao da Prijedlog zakona o dopunama Zakona o izmirenju obaveza po osnovu računa stare devizne štednje nije dobio neophodnu entitetsku većinu, pa slijedi usaglašavanje u Kolegiju kao komisiji.

Ad. 8. Prijedlog zakona o izmjeni Zakona o klasificiranju djelatnosti u Bosni i Hercegovini (drugo čitanje)

Predsjedavajući je dao uvodne napomene.

Nije bilo rasprave.

Prijedlog zakona o izmjeni Zakona o klasificiranju djelatnosti u Bosni i Hercegovini usvojen je u drugom čitanju jednoglasno – sa 32 glasa „za“ (iz Federacije BiH 21, iz Republike Srpske 11).

Ad. 9. Prijedlog zakona o maloljetnim počiniocima krivičnih djela i krivičnopravnoj zaštiti djece i maloljetnika (prvo čitanje)

Nakon što je predsjedavajući iznio kratke podatke, obrazloženje Prijedloga zakona dao je ministar pravde BiH Bariša Čolak.

U raspravi su učestvovali : Šefik Džaferović, Beriz Belkić i Bakir Izetbegović.

Adem Huskić predložio je zaključak ali je kasnije, prilikom glasanja, od njega odustao.

Prijedlog zakona o maloljetnim počiniocima krivičnih djela i krivičnopravnoj zaštiti djece i maloljetnika usvojen je u prvom čitanju sa 27 glasova „za“ (iz Federacije BiH 21, iz Republike Srpske šest), bez glasova „protiv“ i šest „suzdržanih“.

Usvojen je i prijedlog zaključka koji je u raspravi iznio Šefik Džaferović kojim je Dom zadužio Ustavnu pravnu komisiju da održi javnu raspravu o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika. Zaključak je usvojen sa 31 glasom „za“ (iz Federacije BiH 19, iz Republike Srpske 12) i dva „suzdržana“ glasa.

Ad. 10. Prijedlog odluke o zaduženju Predsjedništva BiH da podnese izvještaj o troškovima Predsjedništva BiH (predlagač: poslanik Savo Erić)

Predsjedavajući je rekao da je tekst predložene odluke podijeljen poslanicima.

Nije bilo rasprave.

Prijedlog odluke iz ove tačke usvojen je sa 30 glasova „za“ (iz Federacije BiH 18, iz Republike Srpske 12) i tri "suzdržana".

Ad. 11. Izvještaj komisije Kolegija o nastojanju za postizanje saglasnosti o prijedlogu zaključka Kluba SDA povodom rasprave o Izvještaju Državne komisije za reviziju odluka o naturalizaciji stranih državljana u BiH za period od 1.1.2008. do 30.6.2008., s prijedlogom zaključaka

Predsjedavajući je podsjetio da u Kolegiju nije bilo saglasnosti, pa je proveo drugi krug glasanja o prijedlogu zaključaka.

„Za“ prijedlog zaključaka glasalo je 16 poslanika, „protiv“ 11, pri čemu je iz Republike Srpske protiv glasalo deset, a „suzdržanih“ je bilo pet poslanika. Predsjedavajući je konstatirao da nije usvojen Prijedlog zaključka Kluba SDA povodom rasprave o Izvještaju Državne komisije za reviziju odluka o naturalizaciji stranih državljana u BiH za period od 1.1.2008. do 30.6.2008.

Ad. 12. Informacija Vijeća ministara BiH u vezi sa zahtjevom poslanika Rifata Dolića

Predsjedavajući je u uvodnim napomenama podsjetio da je Vijeću ministara BiH upućen zahtjev za dostavljanje materijala za ovu tačku, u skladu sa zaključcima Proširenog kolegija povodom razmatranja zahtjeva poslanika Rifata Dolića. Vijeće ministara BiH obavijestilo je Kolegij da je zadužilo Ministarstvo finansija i trezora BiH da pripremi materijal pod nazivom: Informacija o preduzetim mjerama i planiranim aktivnostima Vijeća ministara BiH s ciljem ublažavanja posljedica globalne finansijske krize. Iz resornog ministarstva stigla je informacija da su ovaj zahtjev primili tek jučer, a s obzirom da je tačka već uvrštena u dnevni red, predsjedavajući

je rekao da je dogovoreno da ministar finansija i trezora BiH Dragan Vrankić na sjednici usmeno prezentira informaciju.

Ministar finansija i trezora BiH Dragan Vrankić je u svom izlaganju iznio mjere koje je Vijeće ministara BiH preduzelo s ciljem ublažavanja posljedica globalne finansijske krize kao i aktivnosti koje su planirane u budućnosti.²

U raspravi su učestvovali: Rifat Dolić, Jerko Ivanković Lijanović, ministar Dragan Vrankić i Azra Hadžiahmetović.

Informacija Vijeća ministara BiH u vezi sa zahtjevom poslanika Rifata Dolića primljena je k znanju sa 21 glasom „za“ (iz Federacije BiH 13, iz Republike Srpske osam), jednim „protiv“ i 11 „suzdržanih“ glasova.

Rifat Dolić je u raspravi iznio Prijedlog zaključaka pa je predsjedavajući, nakon izjašnjavanja o Informaciji, dao na glasanje pomenute zaključke, koji glase:

„1. Zadužuje se Vijeće ministara BiH da, u roku od 30 dana, izradi i donese strategiju za suzbijanje i ublažavanje finansijske krize i recesije i njihovih posljedica po ekonomiju i građane Bosne i Hercegovine.

2. Zadužuje se Vijeće ministara BiH da Parlamentarnoj skupštini BiH tromjesečno podnosi Informaciju o stanju i preduzetim mjerama za suzbijanje i ublažavanje finansijske krize i recesije i njihovih posljedica po ekonomiju i građane Bosne i Hercegovine.“

Prilikom glasanja u nastavku sjednice prijedlog zaključaka usvojen je sa 22 glasa „za“ (iz Federacije BiH 15, iz Republike Srpske sedam), dva „protiv“ i šest „suzdržanih“ glasova.

**Ad. 13. Prijedlog zaključaka Komisije za saobraćaj i komunikacije povodom rasprave o tački:
Aktuelna situacija u Radioteleviziji BiH i provođenje reforme Javnog RTV sistema u BiH**

Predsjedavajući je konstatirao da je prijedlog zaključaka dostavljen poslanicima.

Branko Dokić je, kao predsjedavajući Komisije, iznio kratke napomene o Prijedlogu zaključaka.

U prvom dijelu rasprave (i replika) učestvovali su: Šemsudin Mehmedović, Husein Nanić, Drago Kalabić, Selim Bešliagić, Niko Lozančić, Šefik Džaferović, Milica Marković, Snježana Rajilić, Ekrem Ajanović, Denis Bećirović, Milorad Živković, Lazar Prodanović, Branko Dokić i Bakir Izetbegović.

U skladu s ranijom najavom da će sjednica trajati do 18 sati, predsjedavajući je dao na glasanje prijedlog da se sjednica prekine, a da se nastavak održi 19.11.2008., s početkom u 10 sati. Ovaj prijedlog prihvaćen je sa 24 glasa „za“ (iz Federacije BiH 17, iz Republike Srpske sedam) i pet glasova „protiv“.

Sjednica je prekinuta u 18,15 sati.

Sjednica je nastavljena 19.11.2008. Počela je u 10 sati.

Prisustvovalo je 36 poslanika. Opravdano su odsustvovali: Jovan Todorović, Milorad Živković, Ekrem Ajanović, Šemsudin Mehmedović, Mehmed Suljkanović i Halid Genjac.

Iz Vijeća ministara BiH sjednici su prisustvovali ministar Sredoje Nović i zamjenik ministra sigurnosti Mijo Krešić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade te nevladine organizacije Centri civilnih inicijativa.

Prije nastavka rasprave o 13. tački dnevnog reda, predsjedavajući je, u okviru prethodnog pitanja, obavijestio Dom da je Centralna izborna komisija BiH donijela Odluku o prestanku mandata Snježani Rajilić zbog toga što je na lokalnim izborima izabrana za načelnika Općine Bosanski Novi – Novi Grad i o dodjeli mandata Milenku Grabovcu, sljedećem kvalificiranom kandidatu s liste kompenzacijskih mandata SNSD-Milorad Dodik, te da će novi poslanik pred Domom dati svečanu izjavu kako bi u potpunosti preuzeo poslanička prava i obaveze.

Zatim je novi poslanik Milenko Grabovac dao svečanu izjavu.

² Dan poslije prvog dijela sjednice predmetna informacija dostavljena je Domu u pisanoj formi i prosljeđena je poslanicima.

Predsjedavajući je podsjetio da je rasprava prekinuta na 13. tački dnevnog reda te da je u trenutku prekida rasprave bilo prijavljenih poslanika za raspravu o Prijedlogu zaključaka Komisije za saobraćaj i komunikacije.

U raspravi i replikama učestvovali su: Slavko Jovičić, Denis Bećirović, Sadik Ahmetović, Momčilo Novaković, Jozo Križanović, Sadik Bahtić, Savo Erić, Šefik Džaferović, Jerko Ivanković Lijanović, Branko Dokić, Milica Marković, Beriz Belkić, Drago Kalabić, Mirko Okolić, Adem Huskić, Selim Bešlagić, Slavko Matić, Husein Nanić, Niko Lozančić, Salko Sokolović, Bakir Izetbegović i Azra Hadžiahmetović.

Prilikom glasanja, najprije se glasalo o prijedlozima zaključaka koje su u raspravi iznijeli Drago Kalabić, Husein Nanić i Jozo Križanović.

„Za“ Prijedlog zaključka Drage Kalabića glasalo je 16 poslanika (iz Federacije BiH šest, iz Republike Srpske deset), „protiv“ devet a osam poslanika bilo je „suzdržano“. Predsjedavajući je konstatirao da nema potrebne entitetske većine (iz Federacije BiH) i da će Kolegij obaviti usaglašavanje o Prijedlogu zaključaka koji glasi:

„Predstavnički dom Parlamentarne skupštine BiH stoji na stanovištu da je Upravni odbor BHRT-a na legalan i legitiman način donosio odluke te da su svi njegovi članovi ovlašteni da rade i u punom kapacitetu donose odluke, ne ulazeći u njihov kvalitet. O kvalitetu rada Upravnog odbora ovaj dom izjašnjavat će se prilikom razmatranja Izvještaja o radu.”

Prijedlog zaključka Huseina Nanića također nije dobio potrebnu entitetsku većinu (iz Republike Srpske) – „za“ je glasalo 20 poslanika (iz Federacije BiH 18, iz Republike Srpske dva), „protiv“ tri a osam poslanika bilo je „suzdržano“. I o ovom zaključku obaviti će se usaglašavanje u Kolegiju kao komisiji. Prijedlog zaključaka glasi:

“Predstavnički dom Parlamentarne skupštine BiH traži od svih odgovornih da hitno i bez odgađanja osiguraju punu primjenu Zakona o Javnom RTV sistemu BiH.”

Zatim je provedeno glasanje o prijedlogu zaključka Joze Križanovića. “Za” je glasalo 16 poslanika (iz Federacije BiH 13, iz republike Srpske tri), “protiv” 11, a “suzdržalo” se sedam poslanika. Prema tome, i o zaključku Joze Križanovića provest će se usaglašavanje u Kolegiju kao komisiji. Prijedlog zaključaka glasi:

Predstavnički dom podržava zaključke Komisije za saobraćaj i komunikacije, osim tačke e), povodom rasprave o tački: Aktuelna situacija u Radioteleviziji BiH i provođenje reforme Javnog RTV sistema BiH. Rasprava o ovim zaključcima dodatno je ukazala na nezadovoljstvo Predstavničkog doma ukupnim stanjem u Javnom RTV servisu BiH, što ukazuje i na nesposobnost Upravnog odbora Javnog RTV servisa BiH da provede neophodne promjene s ciljem saniranja ovog stanja. Zbog svega ovoga, Predstavnički dom Parlamentarne skupštine BiH iskazuje nepovjerenje Upravnom odboru i pokreće postupak izbora novog Upravnog odbora u skladu sa Zakonom o Javnom RTV servisu BiH.

Nakon izjašnjavanja o navedenim zaključcima, pristupilo se glasanju o Prijedlogu zaključaka Komisije za saobraćaj i komunikacije. Glasalo se pojedinačno o svakom zaključku.

Usvojeno je šest zaključaka Komisije (br. 1, 2, 3, 4, 7. i 8.), a o dva zaključka (br. 5. i 6.) će Kolegij kao komisija obaviti usaglašavanje. Rezultati glasanja su sljedeći:

- Zaključak br. 1. – “za” 30 (iz Federacije BiH 20, iz Republike Srpske 10), “suzdržana” četiri.
- Zaključak br. 2. – “za” 30 (iz Federacije BiH 20, iz Republike Srpske 10), “suzdržana” tri.
- Zaključak br. 3. - “za” 29 (iz Federacije BiH 20, iz Republike Srpske devet), “suzdržana” četiri.
- Zaključak br. 4. - “za” 25 (iz Federacije BiH 18, iz Republike Srpske sedam), “suzdržano” osam.
- Zaključak br. 5. - “za” 16 (iz Federacije BiH 14, iz Republike Srpske dva), “protiv” 16, “suzdržana” dva.
- Zaključak br. 6. - “za” 16 (iz Federacije BiH 14, iz Republike Srpske dva), “protiv” 14, “suzdržana” četiri.
- Zaključak br. 7. - “za” 27 (iz Federacije BiH 19, iz Republike Srpske osam), “protiv” jedan, “suzdržano” pet.
- Zaključak br. 8. - “za” 23 (iz Federacije BiH 16, iz Republike Srpske sedam), “protiv” pet, “suzdržano” pet.

Prema tome, usvojeni su sljedeći zaključci Komisije:

“1. Predstavnički dom Parlamentarne skupštine BiH traži od Upravnog odbora BHRT-a da realizira sve zaključke sa 32. sjednice Predstavničkog doma, održane 9. i 14. jula 2008., donesene povodom rasprave o tački: Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu.

2. Predstavnički dom Parlamentarne skupštine BiH traži od Upravnog odbora i Poslovnog odbora BHRT-a da sačine sanacioni program i program razvoja BHRT-a za 2009. godinu i dostave ih Parlamentarnoj skupštini BiH prije razmatranja Prijedloga budžeta institucija BiH za 2009. godinu.

3. Predstavnički dom Parlamentarne skupštine BiH sugerira članovima Upravnog odbora BHRT-a da u njegovom funkcioniranju, osim Zakona o Javnom RTV sistemu BiH i Zakona o Javnom RTV servisu BiH, primjenjuju direktno i odredbe Ustava BiH, međunarodnih ugovora o ljudskim pravima koji su sastavni dio Ustava BiH, međunarodnog prava, Preporuku br. R (96) 10 Komiteta ministara Parlamentarne skupštine Vijeća Evrope kojom se garantira nezavisnost javnih emitera, a koja je usvojena 11.9.1996., s pravnom snagom iznad domaćeg zakonodavstva, kao i drugog *soft law* međunarodnog prava u skladu s članom 11. stav (2) Zakona o Javnom RTV servisu BiH.

4. Predstavnički dom Parlamentarne skupštine BiH predlaže Upravnom odboru BHRT-a da, ako pojedine odredbe Statuta i Poslovnika o radu BHRT-a nisu u skladu s odredbama Ustava BiH i međunarodnog prava, izvrši njihovo usaglašavanje.

7. Predstavnički dom Parlamentarne skupštine BiH traži od Vijeća ministara BiH da osnuje radnu grupu u kojoj bi bili eksperti iz oblasti javnog emitiranja, sa zadatkom da procijene usklađenost Zakona o javnom RTV sistemu BiH i Zakona o javnom RTV servisu BiH sa Ustavom BiH i evropskim standardima iz ove oblasti, te da na osnovu toga bude sačinjen prijedlog za eventualne izmjene i dopune ovih zakona.

8. Predstavnički dom Parlamentarne skupštine BiH traži od Upravnog odbora BHRT-a da u što kraćem roku dostavi Parlamentarnoj skupštini BiH izvještaj o radu i poslovanju BHRT-a u 2007. godini, u skladu s članom 29. stav (1) tačka k) Zakona o Javnom RTV servisu BiH.”

U Kolegiju kao komisiji provest će se usaglašavanje o sljedećim zaključcima Komisije:

“5. Komisija smatra da je u nelegalnoj proceduri donesena odluka Upravnog odbora BHRT-a o smjeni generalnog direktora Mehmeda Agovića na 32. sjednici Upravnog odbora, održanoj 12.9.2008. (Odluka br. 4110-37/91, od 15.9.2008.), zbog grubog kršenja procedure i principa vladavine prava, a time i Ustava BiH i Evropske konvencije o ljudskim pravima i međunarodnih ugovora, a što je potvrdio ombudsmen BiH u svojim preporukama od 29.9. 2008., te predlaže Predstavničkom domu da naloži Upravnom odboru postupanje u skladu s navedenim aktima. S tim u vezi, Komisija predlaže da Upravni odbor stavi van snage Odluku o imenovanju vršioca dužnosti generalnog direktora BHRT-a, broj: 4110-37/92, od 15.9.2008.

6. Komisija predlaže Predstavničkom domu Parlamentarne skupštine BiH da se utvrdi odgovornost članova Upravnog odbora BHRT-a zbog:

- nepoštivanja Zakona o Javnom RTV servisu BiH, član 29. stav (1) tačke b), c), d), j) i k);
- kršenja procedura;
- nepoštivanja Ustava BiH i Evropske konvencije o ljudskim pravima i međunarodnog prava;
- neprovođenja zaključaka Predstavničkog doma Parlamentarne skupštine BiH sa 32. sjednice;
- kao i zbog ukupnog stanja u ovom javnom servisu.“

Ad. 14. Inicijativa poslanika Adema Huskića u vezi s Odlukom o ograničenju uvoza putničkih automobila, teretnih vozila i automobilskih guma

Predsjedavajući je u uvodnim napomenama podsjetio da nadležna komisija nije podržala Inicijativu. Nije bilo rasprave o ovoj tački dnevnog reda.

Inicijativa poslanika Adema Huskića u vezi s Odlukom o ograničenju uvoza putničkih automobila, teretnih vozila i automobilskih guma nije usvojena –“za” je glasalo 13, “protiv” 14, “suzdržanih” je bilo sedam poslanika.

Ad. 15. Inicijativa poslanika Branka Dokića u vezi sa izlaganjem predsjedavajućeg Predsjedništva BiH Harisa Silajdžića prilikom obraćanja Generalnoj skupštini UN-a i Parlamentarnoj skupštini Vijeća Evrope

Predsjedavajući je dao kratke uvodne napomene o Inicijativi, podsjetivši da je nadležna Komisija za vanjske poslove dala pozitivno mišljenje o potrebi da se ona razmatra na sjednici Doma, a zatim je otvorio raspravu.

Branko Dokić obrazložio je Inicijativu.

U raspravi su učestvovali: Beriz Belkić, Azra Hadžiahmetović, Momčilo Novaković, Slavko Matić, Remzija Kadrić, Mirko Okolić, Remzija Kadrić, Rifat Dolić, Denis Bećirović, Bakir Izetbegović, Sadik Bahtić, Jerko Ivanković-Lijanović, Sadik Ahmetović, Branko Dokić, Azra Alajbegović, Savo Erić, Drago Kalabić, Selim Bešlagić, Adem Huskić i Jozo Križanović.

Prilikom glasanja, “za” Inicijativu Branka Dokića glasalo je 16 poslanika (iz Federacije BiH šest, iz Republike Srpske 10), “protiv” 14, a tri poslanika bila su “suzdržana”. Predsjedavajući je konstatirao da će se o Inicijativi provesti usaglašavanje u Kolegiju kao komisiji.

Remzija Kadrić iznio je u raspravi prijedlog zaključka koji glasi : **Predstavnički dom Parlamentarne skupštine BiH odbacuje Inicijativu Branka Dokića u vezi sa izlaganjem predsjedavajućeg Predsjedništva BiH Harisa Silajdžića prilikom obraćanja Generalnoj skupštini UN-a i Parlamentarnoj skupštini Vijeća Evrope, zato što bi rasprava i opredjeljivanje o tome bilo suprotno Ustavu BiH (član IV. tačka 4. i član V. tačka 3.)**.

Prijedlog zaključka nije usvojen - “za” je bilo 11 poslanika, “protiv” 13, “suzdržanih” osam.

Ad. 16. Inicijativa poslanika Remzije Kadrića za raspravu u Domu povodom Rezolucije Narodne skupštine Republike Srpske o ciljevima i mjerama Republike Srpske, sa 14. posebne sjednice, održane 15.10.2008.

Nakon uvodnih napomena predsjedavajućeg, Remzija Kadrić obrazložio je Inicijativu. Nije bilo rasprave.

Inicijativa je usvojena sa 19 glasova “za” (iz Federacije BiH 11, iz Republike Srpske osam), “protiv” 10 i pet “suzdržanih” glasova.

Time je realiziran dnevni red.

Sjednica je završena u 14,05 sati.

Sastavni dio Zapisnika čini transkript 39. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSEDVAJUĆI
PREDSTAVNIČKOG DOMA
Niko Lozančić